

EDITORIAL**MI DESPEDIDA NA LIDER**

Lider, mescos cu e noticia di bo accidente a sorprendemi di un manera asina desagradabel na December, algun hora prome cu aña a habri, asina mes e noticia di bo morto a yega awe mainta pa provoca lagrima, pesadumbre y tristeza. Bo a bay laga nos, Lider, y masque mi sa cu bo ta cerca Dios, mi no por evita e desbordamento di mi sentimentonan. Emocion, manera nos a yega di bisa den tanto ocasion, no ta algo cu bo por domina na bo antoho; e ta manera un potro cu ta busca horizontenan di liberacion ariba sabananan hanchu, sin limite y sin freno.

Ta facil, Lider, pa bisa cu ta Dios su voluntad, pero e hecho mes cu bo no ta bolbe mas cerca nos ta asina dificil pa acepta! Y sinembargo, mester acata e voluntad di Creador. El a hibabo pa un Reino di paz y tranquilidad, y felicidad eterno. Ta esey bo merece, Betico, despues di tanto lucha, tanto lagrima, tanto horanan di gloria y di decepcion.

Conociendo bo bon, Lider, mi sa cu ta asina mes abo a desea di bay. Sigui biba sin e facultadnan mental cu tanto mi a admira den bo, y sin e destreza fisico cu semper bo a demostra, lo a bira pa bo un tormenta y un cruz demasiado pisa pa carga. E noticianan mes di bo estado di salud despues di e accidente no a laga lugar pa hopi speranza cu bo lo bolbe cerca nos cu e sonrisa di custumbra, e brio pa batalla, e agudeza mental cu tabata ilumina e senderonan politico di Aruba.

Lider, un pueblo no sa ta kico e tin te ora cu e perde. Semper mi a bisa na honor di berdad: un politico manera bo ta nace un solo biaha, y djey, hasta siglonan por pasa sin e fortuna di bolbe mira otro di bo talla. Ta ken si no abo por a tuma e bandera di e causa di e pueblo di Aruba firmemente den su man y hibe cu honor te su culminacion?

Status Aparte a bin, Lider, manera cu bo a priminti. Destino, sinembargo, no tabata kier pa bo mira ni un solo hora, ni un solo minuut, ni un solo seconde di bo propio obra realiza. Algun hora prome cu e solo di libertad a brilla pa prome biaha ariba e pais nobo cu abo a crea, bo wowonan a cera pa motibo di un accidente y no a bolbe habri mas.

Ta con por ta posibel, Lider, cu abo mes nunca a mira y nunca lo mira Aruba, e isla cu tanto bo a stima, como pais dentro di Reino? E ta, hopi biaha, e destino tragico di hombernan grandi! Hombernan cu a dedica nan bida na un causa y nunca a mire realiza. Abo a realiza esun di Aruba, y na momento di disfruta di e laurelnan cu tanto esfuerzo a haci posibel, bo wowonan a cera, y despues di tanto luna, a keda cera awor pa semper.

Pa semper, Lider! E ta duro pa acepta. E ta duro hasta pa imagina, ya cu bo ausencia ta ser sinti dia pa dia na bo isla, bo patria, bo ideal y bo ilusion.

Pero bo obra a keda pa papia pa bo. Y futuro generacionnan lo aprecia loque esun di awe no a comprende completamente. Bo nomber y bo figura lo keda como gloria di un isla cu awe ta yorabo.

Mi ta despedi di bo como amigo, Lider, como un di bo admiradornan mas grandi, pasobra ami si a mira semper e cualidadnan excepcional cu como persona y politico bo tabata tin. Pa mi ta manera cu e magia di politica a bay for di Aruba, ya cu e gran mago cu a haci tur cos bira posibel, hasta lo imposibel, a bay. Como politico bo a capta e rayonan brillante di solo y a plama nan cu amor ariba e isla cu a mirabo nace, y awe, na ora di bo morto, ta yorabo amargamente.

Jossy M. Mansur



Betico Croes tabata e prome Arubiano y Antillano, tempo cu Aruba ainda tabata forma parti di Antillas cu a papia den un reunion oficial di Tweede Kamer na Hulanda. E foto ta capta e mirada di seguridad cu cual e gran lider Arubiano di Movimiento Electoral di Pueblo a haci su exposicion.

1938 - 1986